

۱ کانون ثانی  
۱۹۲۶

# تورک تاریخ انجمنی

اون آلتینچی سنه  
نومرو ۱۳ (۹۰)

مجموعه سی



## عبدالحمد ثانينك نوطلری

عبدالحمد ثانينك زمانه عائد بعض وقایع و حادثات سابقه به دائر اکثر قراسندن بسم  
به - علی طریق الاملا - یازدیردینی نوطلرک اهمیت تاریخیه ببناء ک مهملری بوجه آتی  
درج ایدیورز :

جنتمکان سلطان عبدالعزیز خان مرحومک جلوسی تاریخندن برقاچ سنه صکره  
علهنده فسادلر ترتیبی ونفسنه سوء قصد اجراسی کبی برطاقم افکار و نیات فاسدهده  
بولنلرک ریاستی اول وقت ولیعهد سلطنت اولان مراد افندیده ایدی .

مراد افندی او تاریخندن بدأ ایله باشنه مصردن مغدوراً ودها دوغروسی  
مطرودا درسعاده کلن مصطفی فاضل پاشا [۱] ایله بونک افکارنده بعض  
کبرای مصریه بی وکوجه اوغلی اغوب [۲] ایله خرستکی افندی [۳] و  
ضیا [۴] و کمال [۵] بکیر و صیغیر احمد بکک اوغلی محمد بک [۶] و شناسی

[۱] مصطفی فاضل پاشا ، مصر والیسی ابراهیم پاشانک اوغلیدر . (۱۲۴۵) ده مصرده  
دوغدی . هنگام شبانده استانبوله کلدی . صدارت مکتوبی قلمنه دوام ایلدی . برمدت  
صکره مصره عزیمتله ینه عودت ایتدی . مجلس والا اعضا لهنه تعیین ایلدی . وزارت  
توجیه اولندی . مالیه و معارف نظارتلرنده بولندی . مجلس خزائن ریاستندن انفصالنده  
اوروپایه کیتدی . مصرده اصول وراثتک تغییرندن منفعل اولدیغندن ضیا پاشا ، کمال بک  
وسائر ذواتی یاننه جلب ایله احاشه ایدهرک نشریاتده بوللندی . اوشاده عبدالعزیز خان یازدینی  
عریضه مطبوعدر . خاقان مشارالیهک اوروپایه سیاحتنده پاشا استانبوله عودت ایتدی . مجالس  
عالیهیه مأمور اولدی . ایکنجی دفعه مالیه و ۱۲۸۸ ده عدلیه نظارتنه نصب و برقاچ آتی  
صکره عزل ایلدی . ۴ ذی القعدة ۱۲۹۲ ده وفات ایتدی . ایوب قبرستانه دفن اولندی .

[۲] کوچه اوغلی آغوب افندی ، صراف مشهوردر . آرنارود کوبنده کی یالیننده اقامت  
ایدردی . سلطان مراده منتجب ایدی .

[۳] خرستکی ، صراف مشهوردر .

[۴] ضیا پاشا وفاتی : جمادی الاخره ۱۲۹۷

[۵] کمال بک وفاتی : ۲۸ ربیع الاول ۳۰۶

[۶] محمد امین بک ، محمود ندیم پاشانک بیوک برادری تلغراف و پوسته ناظر اسبقی احمد  
شکری بکک اوغلیدر . ملفی باب عالی ترجمه اوطه سنه دوام ایتدیکی صرهده رفقای معلومه سیله تشکیل

افندی [۷] و سعاوی [۸] ملعونی رو بونلرك كندی افاده لرندن آكلاشیلدیغنه كوره جمله سنه وكالۀ ریاست ایتك و خانه سنده مشكللرینی حل ایتك اوزره

ایلدیکی ( یکی عثمانیلر جمعیتی ) اعضاسنك ولی افندی چایرنده کی اجتماعلرنده فدائیلر طرفندن باب عالیده وکلانك ازاله سی و محمود ندیم پاشانك مقام صدارته نصی حقنده وبریلن قراری ، اعضادن آیه الله بك ، پدری صبحی پاشایه ، مشارالیه ده سرعسكر مترجم رشدی پاشایه اخبار ایتدی . حكومتك تدابیر تحفظ كارانه سی اوزرینه دیگر ذوات كی محمد بك ده ترك دیاره مجبور اولدی . عمجه سنك صدارتنده استانبوله عودت ایتدی . ۱۲۹۱ ده وفات ایلدی . روم ایللی حصاری قبرستانه دفن اولندی . سرآمدان اذکیادن ایدی . « كلدان » نامنده كوچوك بر مجموعه اشعاری مطبوعدر . آلمانیا - فرانسه محاربه سنده رفقا سیله برابر پارسده بولندقلرندن زخاف عسكری قیافتنده فس و شالوار کییوب فرانز اردوسنه مراجعت و فرانزلرله برابر حربه اشتراك ایلدی . فرانزلر ، بو حاله تعجب و سبب اشتراكی سؤال ایتلریله « مادامكه بو مملكتده پاشایورم ، مملكتك بویه بر كوندن الدن كلن معاوضی ایفا ایتكك مجبورم » دیمشدر .

[۷] شناسی افندی وفاتی : جاذی الاخره ۱۲۸۸ .

[۸] علی سعاوی افندی ، طهره ده مکتب رشدی معلملكر كرنده بولوندی . استانبوله كلدی . اشتهار ایتدی . ( یکی عثمانیلر جمعیتی ) اعضاسندن ذوات معلومه ایله برابر پارس ولوندریه عزیمتله اهل حكومت علیه غزته نشر ایتدی . صادر اولان اراده اوزرینه ۱۲۹۳ ده استانبوله عودت ایلدی . محرم ۱۲۹۴ ده متايز رتبه سیله مکتب سلطانی مدیرینه تعیین اولندی . سلطان مرادك اجلاسی ایچون باشنه طولیادینی اشخاص ایله چراغان سراینه كیتدیکی صره ده ۱۸ جاذی الاولی ۱۲۹۵ ده قتل ایلدی .

۱۲ ربیع الاول ۱۲۸۷ تاریخی ( قاموس العلوم و المعارف ) جزئه مربوط ( علوم ) غزته سنده « هنوز ۳۲ ، ۳۳ یاشنده اولوب بو گونه دك آغری صیزی كورمه بن و قلمیله بونجه اعدای دین و عدالت مضمحل اوله جفی مظنون بولنان بر سعاوی . . . . » دیمشه نظراً ۱۲۵۵ ، ۱۲۵۶ تاریخنده دنیا به كلدی . ۳۹ ، ۴۰ یاشنده دنیا دن كیتدی . نامق كال بك مرحومك ، عبدالحق حامد بكه یازدینی بر جوابنامه نك علی سعاوی افندی به عائد فقراتی : « . . . سعاوی هیچ ده سنك تخمینك كبی آدم دكل ایدی . بر چهره نمایشه آلدائمشك . ایکی سنه آرقاداشلق ایتدم . او آدم اوله « براز غرض كار ، برازده مغلوب امل » دكل ، دنیا ده مثلی كوریلدك بر شارلاتان ایدی . بن قولایلقه هر شیئه آلدائیم ، اوله ایكن بكا كندینی - طوغری عربجه دن بشقه برلاندن بر صحیفه اوقویه من ایكن - یدی سكر لسان بیلیر صورتنده كوستردی . او قدر جاهل ، جهالتیله برابر او قدرده مغرور ایدی كه تركه اوج سطر بر شی یازسه مسخره عالم اولوردی . دها اوروپادن كله دن اول كندینی دعوت ایتدیرمك ایچون اصول مشورت علیه یازدینی بندلر ( وقت ) غزته سنده قولاقلرینی صالابوب طور بیور . . . . براقلم اوقیلدن اولانلرك قولندن ، فعلندن ، وضعندن ، طورندن ، ذكرندن ، فكرندن ، هیچ بر وقت ، هیچ بر درلو خیر متصور دكلدر . »

مترجم رشدی پاشا [۱] ى و اوغلى [۲] و رضا پاشا [۳] و اوغلى ابراهيم

[۱] محمد رشدی پاشا ، سينوب داخلىده آياندون اهايسندن قاچى حسن آغانك اوغلىدر . ۱۲۲۶ ده آياندونده دوعدى . عسكره داخل و تدريجاً ملازم اولدى . فرانزجه تحصيلنه چاليشه رق نظامات عسكريه يى ترجمه ايتديكندن ( مترجم ) ناميله اشتهار ايلدى . خاصه اردوسى مشيرى ، طوبخانه مشيرى ، مجلس تنظيمات ، مجلس خزائن ، مجلس والا رئيسى ، احكام عدليه ناظرى ، دفعاتله سرعسكر و صدراعظم اولدى .

صدر اسبق سعيد پاشا مرحومدن مسموعدر : عبدالحميد ثانيك جلوسنى متعاقباً برجهه كوني صدراعظم رشدی پاشا سرايه كلير . « استراحت ايتسون ، يمك يسون ، كوريشه جكم » اراده سى تبليغ اولنور . برآز صكره « افندمن تشریف بيوريورلر » ديرلر . پاشا مرديونك آلت طرفنده طورور . خاقان ، كمال وقار و حشمتله ايتهرك التفات ايدر و « پاشا كندى كنديمه تراش اولدم . جامعه كيديورم . كله يمه كوريشه لم » دير . مشاراليه ده « افندمن كندى ايشكزى كنديكز كورريكز » طرزنده مقابله ده بولنور . رشدی پاشا اوزمان مابين باش كاتبي اولان سعيد پاشايه « اولاد خطا ايتدك . بو ، غريب آدم . سلطان عزيزك خلعي صره سنده بن حسين عوفى پاشايه اخطار ايتدم . ايش فنا اولور ديدم . ديكله مدي . سلطان مراد اويله اولدى . بوني اجلاسه مجبور اولدق . شيمدى كندى كندينه ايش كورمكه قائلشدى . دون كيجه ظريفى جاغيرتمش . امورماليه ده دائر مذاكراته كيريشمش . سفيرلى جلب ايدىيور ، سوله شيور . دها جلوسنك برنجى كوننده بويله ، صكره نه اولاجق ؟ بيم اصلا اميدم قلدى » ديهرك اظهار تأثر ايدر . سلطان عبدالعزىك خلعه ده مدخلى اولانلرك هربرى بر طرفه تبعيد ايديلدى صره ده رشدی پاشانك استنبولده قالسى و خلق ايله اختلاط ايتى خوش كوريلديكندن وجودى استقلال اولمغه باشلادى . ساحلخانه سنده اجتماع ايديله مى ، عكس تقديرده قوه ضابطه يه مراجعت اولته جفى مابين باش كتابتندن صدارت واسطيله كندينه تبليغ قلندى . مغنياده كى چفتلكنه چكيلمكه مجبور اولدى .

محكمة مشهوره صره سنده خسته اولدينى حالده ازميره كتيريلهرك استجواب ايديلدى ايله ده جواب كافى آلته تدفيندن مغنيايه اعاده اولندى . جاذى الاولى ۱۲۹۹ ده اوراده وفات ايتدى . خانويه جامي حظيره سنده دفن ايديلدى .

[۲] رشدی پاشانك اوغلى سليمان رشاد بك ، محكمة تميز و شورى دولت اعضاقلرنده بولندرق بالاخره تقاعد ايديلدى . ۱۷ جاذى الاولى ۱۳۴۰ ده وفات ايتدى . سليمانيه جامي حظيره سنده مدفوندر .

[۳] حسن رضا پاشا ، مصر چارشينده عطار چراغى اولدينى حالده سرايه آلتدى . مابينجيلىكه ارتقا ايتدى . مابين و خاصه و طوبخانه مشيرلكارنده ، واليككرده ، تجارت نظارتنده مكررا بحريه نظارتنده ، دفعات ايله سرعسكرلكده بولندى . ۱۸ ذى القعدة ۱۲۹۴ ده وفات ايتدى . سلطان محمود تره سى حظيره سنده مدفوندر . سلطان عبدالمجيد دورنده فوق العاده مقبل ، بنا برين سلطان مراده مائل ايدى .

پاشا [۱] بی ودها اسملرینی ذکر ایتک ایسته مدیکمز بعض کبرای محلیه بی وبونلردن ماعدا بر چوق بو مثللو اشخاص و عونلرینی جمع ایدرک و لیل و نهار بونلرله عیش و عشرت و عقد انجمن مفسدت ایلهرک و هر دورلو و سائطه مراجعتدن کری طور مایاراق سلطان عبدالعزیز مرحومک علیهنده فسادات ترتیبه چالشمقده برابر اول وقت اشخاص مذکور مک غیرت و مساعی فسادکاریسیله میدان انتشاره قونان عبرت و غیرت غزتهلری و کلی اغوبک [۲] کدک پاشا تیاتر و سنده و باغلر باشنده سلسیره و سائر مثللو او بونلر و اوراق حوادث محلیه و اجنبیه واسطه لریله و بونلرله دخی اکتفا ایتمه رک بر طاقم رسائل فاسده نشریه افکار عمومی اهلای بی سلطان عبدالعزیز مرحومک و محمود ندیم پاشا [۳] کی اصدقای بندکانک علیهنه جویرمکه

[۱] ابراهیم پاشا، رضا پاشانک اوغلیدر. منیره سلطان تزویج ایدیلدی. بر قاج دفعه رتبه عسکریه سی رتبه ملکیه به تبدیل اولندی. دوردنجی اردو ارکاندن و فریق ایکن ۱۲۹۷ ده طرز و زده وفات ایلدی.

[۲] کلی آغوب، عثمانلی تیاتر و سنک صاحبیدر. اویتادینی ادبی او بونلر مناسبتیه اسی تاریخ ادبیاته یکمیشدر. اهتدا ایدرک آغوب (یعقوب) ه تبدیل ایدیش و سلطان عبدالحمد طرفندن موسیقه مایونه آلمش ایدی.

[۳] محمود ندیم پاشا، شام و بغداد والیکلرنده بولمش اولان و زرادن نجیب پاشانک اوغلیدر. ۱۲۳۲ ده استانبولده دوغدی. آمدی قلمنه دوام ایتدی ائنده عالی و فوآد پاشالک دلائلریله رشید پاشایه انتساب و آنک همیله ترقی ایلدی. صدارت مکتوبنجی، آمدجی، بککچی، صدارت و خارجییه مستشاری اولدی. مؤخرآ رتبه وزارتله صیدا والیکنه تعین اولندی. شام، ازمیر، طرابلس غرب والیکلرنده، تجارت و دعاوی نظارتلرنده، ایکنجی دفعه صدارت مستشارلنده بولندی. بحریه ناظری ایکن عالی پاشانک وفاتنده صدر اعظم اولدی. بعدالزل قسطنونی والیکنه تعین قیلندی. اورادنده عزلنده طرز و زده اقامته مأمور اولدی. بر ایکی آی صکره اطنه والیکنه کوندریلدی. مؤخرآ شورای دولت ریاستنه، ۲۴ رجب ۱۲۹۲ ده ایکنجی دفعه مقام صدارته نصب اولندی. سکنز طقوز آی صکره عزل و چشمه ده اقامته مأمور ایدیلدی. بر مدت ده ساقز و مدالی ده اقامت ایلدی. ذی الحجه ۱۲۹۷ ده داخلیه ناظری اولدی. جودت پاشانک عبدالحمد خانه تقدیم ایتدی بر عریضه ده محمود پاشا استانبوله جلب ایدیلدکن صکره بر بویوک ایشده استخدام اولتورسه ایکی دولت آراسته کی مناسبات خالصانه به خلل کله جکنی انکلتزه سفیری باب عالی به تبلیغ ایلدیکی حالده محمود پاشا طرابلس غرب والیسی ایکن طانیدینی انکلیز قونلوسنک اوصرده استانبوله کلی اوزرینه آتی اله آتهرق انکلتزه بولتیقه سنه خدمتده بولمجه قی تأمین ایلیمه استخدامنه معاونتده بولنلمسی لوندرومن استانبولده کی سفیره امر ایدیلدیکی و بوسورتله داخلیه نظارتنه

جالش مقده ايدىلر. وبومفسدلر آره صيره مفسدتلرى طورولدقچە ايجلرندن بعضيسى نقي ايدىلكده وياخود نقي ايديله جكلرىنى حس ايدنجه كندولكلرندن فرا ايله اوروپا نك ممالك مختلفه سنده نشر اراجيف و اجراى فساددن كرى طور مامقده وبعضاً دخى تزد خاقان مرحومده شفيعلرى ظهور ايله مظهر عفو اولارق ممالك محروسه يه عودت ايلكده ومع مافيه بونجه الطاف وعناياته معرض تشكرده ابراز ندامتله افكار فساديه لرندن عدول ايتلىرى لازم كلورايكن بالعكس حرَكَات فساديه لرنده اصرار ايله روز وشب اجراى ملتندن خالى اولما مقده ايدىلر. صيق صيق مواقع مختلفه ده يعنى مصطفى پاشانك باغنده وياقوناغنده وياخود كوچه اوغلى نك اسكدارده واقع باغنده وياخود نسبتيه كوشكنده حليم پاشا يالى سنك [۱] آرقه جهتنده مادام قلورى نامنده بريسك كوشكنده واكتريا قوربغهلى دره جفتلكنده اجتماع ايدمرك حال وكارلرى مرحوم مشاراليسى ذم وقدح ايتك وافكار عموميه محليه واجنيه يي عليه جلب ايله مك اوزره پلانلر ترتيبيله مشاراليله حضر تلىرى برآن اقدم مقامندن دوشورمرك يرينه ولى عهدى كچورمك خصوصندن عبارت ايدى. خرستاكى وكوچه اوغلى اغوب دخى دائماً كرك مالا وكرك بدنأ والحاصل ماده ومضاً بوافكاره خدمت ايتلشدر.

ولى عهد پرنس مشاراليله استحصال مطالبى و اجراى نيائى ايجون لزومى كورينه ن مبالغى اكثريا يا دوغروندن دوغرويه بونلردن ياخود بونلر واسطه سيله ديكر منابعدن تدارك واستيفا ايدر ايدى. سلطان عبدالعزيز مرحومك خلعتدن تقريباً برسنه مقدم جمعيت فساديه مذكوره اركان اصليه سندن بولنان مصرلى حليم پاشا [۲] ولى عهدك

تعيين ايدلىكى بيان ايدىلكده در. خسته لكنتك امتدادندن طولايى انفصال وايكى آى صكره رجب ۱۳۰۰ ده ارتحال ايدى. غير مطبوع ديوان اشعارى، اصلاح دولته دائر (حكايه ملك مظفر) و (آيينه دولت) عنوانلى ايكي رساله سى، اس انقلاب و ذيلنه دائر انتقادنامه سى، (حسبال) ناميله منظومه سى واردر. عبدالحميد ثانى، بو مخطره ده مشار اليك صداقتى سويلدىكى خالد بالاخره صدر سابق توفيق پاشا ايله مشار اليه ن بحث ايتدكلى صيره ده «محمود نديم پاشانك صداقتى جملى ايدى. اعتاده شايد بر آدم دكل ايدى» ديتشدر.

[۱] بلك قوبونه ناظر و بك دلر با اولان بويالى، اساساً صدر اسبق يوسف كامل پاشا ايله حليمه سى زينب خام افتديتكدر. آنلرك وفاتيله حليم پاشايه انتقال ايتلشدر.

[۲] عبدالحليم پاشا، مصر واليسى محمد على پاشانك اوغلى در. رتبه وزارت توجيه ومجالس عاليه يه [مجلس وكلايه] مأمور ايدىلدى. بالاخره شوراي دولت اعضا لته تعيين اولندى.

نامنه اوله رق جمعیت مبحوئه نك رأى و قراريله بر ايكي ميلیون لیرالق بر استقراض عقدی ضمننده اوروپایه اعزام قیلنمش و فقط بوبابده کی تشبثاتك كافه سنده موفوق اوله مایه رق مایوسانه درسعادته عودته مجبور ایدیلش ایدی . مصرلی مصطفی پاشا كافه ماملکینی مفاسد مبحوئه نك اجراسی بولنده صرف ایدرک نهایت الامر اعلان افلاس ایتک درجه سته واصل اولدقدن صکره عدم موقتيله مایوسا بو یولده افنای جان ایتش و حلیم پاشا دخی بو طریقه مالا و بدنأ دورلو فدا کارلقلر اجرا ایتش و نهایت موفوق اوله مایه رق کندی کفالتی تحتنده اوروپادن استقراض مذکورى عقد ایتک اوزره تشبثاده بولنه رق موفوق اوله مامشدر . خلع سلطان عبدالعزیز خانیدن تقریباً آلتی ماه مقدم ینه او جمعیتك رأى و قراريله رشدی پاشا و حلیم پاشا و سائر ارکان جمعیتك تشویق و کفالتيله غلطه صرافانندن لاقل بر میلون لیرالق بر استقراض عقدی ایچون بانکرلره ینه ولی عهد نامنه اوله رق افراد جمعیت طرفدن مراجعت وقوع بولش و حتی مبلغ مذکورک تدارکی خصوصی خرستاکیه احاله اولنمش اولدیغندن موسی الیه کیفیتی موسیو ظریفی به [١] آچش وعقدی تصورنده اولدقلری استقراض مبحوئه عنیه مشارکتی طلب اولنمش ایدی .

موسیو ظریفی غلطه صرافاننک سر آمدانندن بولندیغندن و ولی عهدک مبلغ مزبورى تأدیه خصوصنده ویرمش اولدیفنی تأمیناته اعتماد و امنیت ایده مدیکندن کیفیتی شوکتنا ب عبدالحمید خان افندمز حضر تدرینه عرض ایتکلکی تصمیم بوبابده بر کون شوکتلو افندمز چفتلکارنده ایکن صورت مخصوصده کلوب شرف ملاقاتی استرحام ایلمسیله ارزان بویوریلان مساعده سینه اوزرینه کلوب و برادر عالیلری صرافانمزدن بر میلون لیرالق بر استقراض عقدی تصورنده بولنیورلر و بوبابده غلطه صرافاننه مراجعت ایلدیلر . بو اچهدن یدلرینه یوزده قرق نسبتنده بر قسمی

٢٨ ذی القعدة ١٣١١ ده فجأة وفات ایدی . سلطان محمود تربسی حظیره سنده مدفوندر . مصرده وراثت اصولنک تبدیلندن دولای - برادر زاده سی مصطفی فاضل پاشا کی - سلطان عبدالعزیزه بالطبع مغیر و ولی عهد محب ایدی . حین بیعتده سلطان مراده « مرحوم برادر مصطفی پاشا بونی کورملى ایدی » دیدکده سلطان مرادک « سزی کوردیکمه متلی و متشکرم » طرزنده مقابله ایتدیکی مرویدر . عبدالحلیم پاشا صنایع نفیسه نك رسم و موسیقی قسملرنده ماهر ایدی .

[١] مشهور بانکرلردن .

تورک تاریخ انجمنی مجموعه سی - ٥

آنجنق كچه بيله جكدر . بر طاقم تامينانده دخى بولنيورلر . صرافان ايسه بو تاميناتى كافى كورمه يورلر . بر حال وقوعنده اچقه نرى ضايع اوله بيلور . مبلغ من بورك تادييه سى كفالتنى درعهده ايدر ميسكز . اكر ابدردده سوز ويررسه كز صرافان بو اچقه لرى وبره جكدر . « دير و بونك غايته محرم اوله جفنى علاوه بيان ايله مكتوم طوتلاسى استرحام ايلر . اشبو تكليف مالايطاقى استماع ايدنبجه شوكتما ب افنديز » بن معاشمله اداره اولمقده يم . بو اچقه يى برادرى بلكه غير مشروع صورته صرف يده جكدر . آكلاديقمه كوره عموجه مك عليهنده استعمال اولنه جق . بناء عليه بويله بر كفالتى اصلا قبول ايتيم و عموجه مك عليهنده صرف اولنه جق اولان اشيا مبلغى هيچ بر وجهله تصديق ايدم . و حتى يابانلرى دخى لغتله ياد ايدرم . سزك دخى فى مابعد كلوب بكا بويله برشى تكليف ايتمك ككزى تجويز ايتيم . صكره محبتمزه خلل كلور . « ديو جواب ويرمشد ايدى . بو محاورده اوكونى ساعت طقوز راده لرنده چقنلكده چادر شكندده بر كوشكده جريان ايتش ايدى . بو آچقه نك استقراض ايديلوب ايديلمديكى شوكتما ب افنديز جلو سلى عقينه قدر خير آله نامشاردى . جلوسلرند پرنسك حكومتى ائسانده كرك خاندان عبدالعزيز خانينك و كرك اك كوچوك جاريه يه قدر باجمله جوارى نك اموال و محوهراتنك مثلى نامسبق بر صورت غير مشروعهده وطن و ملت نامنه مصادره اولنه روق خريستاكى به بو مثللو بومقوله فسادلر ايجون عقد ايديلن استقراضلر بدل ويريلش اولديغنى آكلامشلدرد . برقچ دفعه لر دخى بيوك داماد محمود پاشا [١] حليم پاشادن روايه پرنسك سلطان عبدالعزيز مرحومى قايق ايله فندقلى جامع شريفنه كيدر كن طور پيدو ايله تلف ايتمك نيتنده بولنديغنى شوكتما ب اندمزه جلوس ميامن مانوس ولى النعميدن صكره سويله مش و طور پيدونك تلغراف تللرى ساحلده لنكر انداز بولنه جق واشترا اولنه جق بر يونان كميسنه قونيله جفنى علاوه ايله مش ايدى .

[١] محمود جلال الدين پاشا، داماد فتحى پاشانك اوغليدر . سلطان عبدالمجيد كرعسى جيله سلطان تزويج ورتبه و زرات توجه اولندى . شوراي دولت اعضالنده، تجارت نظارتنده سر عسكر قائم مقاملغنده ، سر عسكر لكده بولندى . وقعه خلعه مدخلى اولانلرله برابر طاغنه نقي و قلمعهده حبس ايديلدى . رجب ١٣٠١ ده ارتحال ايتديريلدى . طيب مداويسته ويرديريلن رابورده « معده سينده كى فسادك نرله معديه تحول وبعده حمى تيفويدى ظهور ايتسندن متأثراً ١ مائس ١٣٠٠ ده وفات ايلديكى » كوستريلمدر . سلطان عبدالحميد، حجاز واليسنه على - طريق الاملا - يازديرديغى بر تلغرافنده مشارالهي « شيشقو محمود » ناميله ياد ايديلور .



پرنسك جعه سلاقلارنده وسائر كيديش و غلبه لك كونلرده معهود جمعيت فساديه  
 افرادندن بعضيسنى غايت سريع السير حيوانلره ييندرهرك مرحومى عربيه سنده  
 ايكن تلف ايتديرمك وياخود مرحومك كيلارجيلرندن بعضيسنى قزانارق تسمم  
 ايتديرمك وياخود سرايده دائره لرليك همجواريسندن استفاده ايدرك كيجه لين يئاق  
 اوطنه سنه مخفي آدملىر سوقق ، وياخود مرحومك دائره سنده بر حريق چيقاراراق  
 حاصل اوله جق عربده دن استفاده ايلك وياخود علم طاغنه ويا اياز آغا چفتككنه  
 تشريف بويوردقارنده اطرافنى ابلوقه يه الاراق اتلاف ايتديرمك كچي چوقنيات  
 فاسده ده بولندينى و بو بابه تشبثاتدن كرى طورماد يني روايات و دلائل قويه ايله  
 معلوم اولمشدر . حتى بشكطاش جاده سنده جامه ك قارشيسنده بر قصاب و بر سودجي  
 دكانلرله ده بولرك اتصالنده بولنان ديكر ايكي دكاني اشترا ايدرك اورادن دكانلر  
 دروننه احضار ايديلن بر طاقم خونه وسلاح شورلر و حيدود مقوله سى اشخاص واسطه سيله  
 مرحومه مرورى ائناسنده يعنى يينك طاشنه اينر كن سوء قصد ايتديرمك اوزره  
 تهياتده بولندينى مؤخرآ ضابطه طرفندن كشف اولنه رق فسادلرينه محل قالماش  
 و اوصيره ده دكانلرك صاحبلى تجسس اولندقدده جمعيت فساديه افرادى طرفندن  
 مجدداً اشترا اولندينى تحقيق قىلنمشدر . مذكور دكانلر اول وقت سلطان عبدالعزيز  
 مرحوم طرفندن مبايعه اولنه رق قاباديلش و او وقتدن برو يقين و قتلره قدر مسدود قالمشدر .  
 مرحومك قرناسندن دخي بر چوغى مذكور جمعيت فساديه آلش ايدى . حتى  
 زيور بك [۱] قومشولنى مناسبيله اكثريا ولى عهد ايله برلكده قوربه لى درده  
 طعامده بولنوب جمعيت فساديه نك اعضاسندن ايدى . عموم حرم هايونده ايكنچي  
 كتابت خدمتنده بولنان ابرو نكار نام بر قلفه جاريه دائما حسين عوفى [۲] نك

[۱] زيور بك ، اسكدارده والده جامى خطيبى ماهيه جى سعيدافنديك اوغلى در . اندرون  
 سلطان عبدالعزيزك ماينچيلككه آلندى . ايكي دفعه سرقين اولدى . ۱۳۰۰ ده وفات ايدى .  
 [۲] حسين عوفى پاشا ، اسپارطه داخلنده (كلان دوست ) قيه لى احمد اغاك اوغلى در .  
 ۱۲۳۶ ده او قريه ده دوغدى . استانبوله كلرك مدرسه ده دايسنك تزدنده تحصيل علمه  
 باشلادى . مؤخرآ مكتب حريميه داخل اولدى . ارکان حريميه يوز باشيلغيله نشأت ايلكدن  
 اون التى سنه صكره خاصه مشيرى و سرعسكر قائممقامى اولدى . يانيه و بكيشهر اردوسى  
 قوماندانلغنده ، كريد والىلكى ايله فرقه عكره قوماندانلغنده بولدى . سرعسكر ايكن  
 محمودنيم پاشا طرفندن اسپارطه يه نفي ايتديريلدى . عودتده آيدن والىلكنه ، بحريمه نظارتنه ،

و پرنسك وساثر كبراي مفسده نك قوناق ويا ليرينه كيدرك واسطه مستقلاه  
فساد اولش و حتى مؤخرآ سلطان عبدالعزيز مرحومك ماده قتلنده ذى  
مدخل اولدقلى تين ايدن ايكنجى خزينه دارى ابروكال نام خزينه دار ايله  
آرزو نياز نام بشنجى خزينه دارى و بونلر كى دها بعض رذيله و ملعونلرى جمعيت  
فساديه اذخال ايدن مرقوم ابرونكار اولدينى و بونلر ايله مفسدين مذكوره بيشنده  
سرور آغا نامنده بر مفسد حرم آغاسنك واسطه مخايله اولدينى محقق بولمىشدر.  
ايشته آكلاشيلديغنه كوره جاريه لردن دخى بر چوغى قزانلش ايدى. بونلر و مذكور  
ماينجىلر دخى پرنسك هر دورلو فساداتى تسهيل ايتدكلى كى حتى ايجلرندن  
بريسى يعنى فخرى [١] ملعونى بو دفعه ايدىلن تحقيقاتدن آكلاشيلديغنه كوره  
مرحومك شهادتى اثناسنده قوللرني طوتدينى تين ايلشدر. مرحومك قرناسنى  
قازانمق داخلآ بر سوء قصد اجراسى فكرينه مبتى ايدى. بوسره ده تارلا باشنده  
خلعدن تقريبآ بر بيقق ايكي سنه مقدم بر حريق ظهور ايدر. شوكتآب عبدالحميد  
خان افنديمر دائره عليه لرينك بر او طه سنده صوبا ياقارلرايدى. سلطان عبدالعزيز  
مرحومه شوكتآب افنديمرك منقال يرينه صوبا ياقدرلرينى كمال مفسدته جاريه لر  
واسطه سيله عرض ايتمشلر و شيمدى ارتق صوبا يرينه فى مابعد منقال ايله  
دائرة كرى اداره ايدى كز ديو اراده بويورسه كز دخى موافقت ايتمز ديو سويلمشلر.  
(مابعدى وار)

ايكنجى دفعه سرعسكرلكه ، ٢٦ ذالحجه ١٢٢٩٠ ده - سرعسكرلك عهده سنده قانلق  
اوزره - مقام صدارته تعيين اولندى. بعد العزل والبالكره واوچنجى دفعه سرعسكرلكه نصب  
ايدىلدى. دورونجى دفعه سرعسكرلكه بولندينى ائاده سلطان عبدالعزيزى خلع ايتدى .  
١٢٩٣ جازالاوليسنك ٢٤ نجى كيجه سى مدحت باشانك قوناغنده مجلس وكلا منعقد  
ايكن قول اغاسى چركس حسن طرفندن قتل ايدىلدى . سليانيه جامع شريفى حظيره سنده  
دفن اولندى .

[١] فخرى بك ، ١٢٦٣ ده ايوبده دوغدى . اندرونده يدى سنه خدمته اصطلبل  
عامريه آت خدمتيله كلوب اوچ آى صكره يكرى بر باشنده ماينجىلكه آلندى . سلطان  
عبدالعزى طقوز سنه خدمته ايكنجى ماينجى اولدى . خلع وانتقالده مظنون اولانلرله برابر  
طائفه نى ايدىلدى . اعلان مشروطيتدن صكره استانبوله عودت ايدى . ١٤ ربيع الاخر  
١٣٤٠ وفات ايتدى .